

Vodeći se principima demokratije, ljudskosti i oslanjajući se na poštovanje ljudskog dostojanstva, slobode, jednakosti i ostalih vrijednosti definisanih Ustavom Bosne i Hercegovine i Univerzalne deklaracije o ljudskim pravima, mi, zabrinuti građani, učenici, studenti i prosvjetni radnici objavljujemo:

Otvoreno pismo povodom hapšenja direktora srednje škole u Bihaću, Keskin Fatiha

04. decembra 2019. godine

Poštovana Službo za poslove sa strancima,

03. decembra, nakon upućenog poziva na razgovor od strane Ministarstva Unutrašnjih Poslova Unsko-sanskog kantona, Fatih Keskin, direktor Richmond Park škole u Bihaću, lišen je slobode. Gospodin Keskin je državljanin Republike Turske koji je do jučer imao stalno pravo boravka u Bosni i Hercegovini. Samo par sati kasnije, bez viđanja sa advokatom, gospodin Keskin je transportovan u imigracioni centar u Istočnom Sarajevu. 04. decembra Služba za poslove sa strancima BiH ukida boravišnu dozvolu gospodina Keskina, na osnovu prijetnji po sigurnost i javni mir.

Kako smo mi, ispod potpisani građani, imali priliku upoznati gospodina Keskina, te raditi sa njim i učiti od njega, zanima nas kako je došlo do iznad opisane situacije. Gospodin Keskin je uzoran građanin grada Bihaća, divan suprug i otac dva rođena Bišćana, profesor koji se trudi da prenese sva svoja znanja, vještine i kvalitete na svoje učenike, profesor koji već godinama uspješno vodi kolektiv Richmond Park-a Bihać, trenutno najuspješnije obrazovne institucije Unsko-sanskog kantona. Za to vrijeme je izveo pet generacija učenika, s izvanrednim rezultatima kako domaćem tako i na međunarodnom nivou. Njegovi učenici su danas studenti prestižnih fakulteta, a mnogi od njih uspješni poslovni ljudi u Bosni i Hercegovini.

Zbog svega navedenog pozivamo Službu za strance da bosanskohercegovačkoj javnosti objasni zašto je gospodin Keskin lišen slobode.

Bosanskohercegovačka javnost ima pravo da zna:

1. Na osnovu čega je gospodin Keskin pozvan na razgovor u Ministarstvo Unutrašnjih Poslova Unsko-Sanskog kantona BiH?
2. Zašto je gospodinu Fatihi, nakon hapšenja uskraćeno pravo na viđanje advokata?
3. Kao razlog oduzimanja boravišne dozvole, navedeno je da gospodin Keskin predstavlja prijetnju javnom redu i nacionalnoj sigurnosti BiH: na koji način je ova

prijetnja utvrđena? Koji su konkretno razlozi i postupci gospodina Keskina doprinijeli ovakvoj iznenadnoj odluci?

Različite su i brojne lekcije, te vrijednosti koje su mnoge generacije srednjoškolaca imale priliku naučiti od, prije svega poštenog čovjeka, gospodina Keskina. A najčešće je svojim učenicima govorio da bez obzira koji daljnji put odaberu u svojoj akademskoj karijeri i bez obzira u kakvoj se situaciji njihova domovina nalazila, njihova obaveza je da svoje znanje ulažu u dobrobit i razvitak zajednice i države u kojoj su se rodili. Ali kako ulagati svoju mladost i svoje znanje u državu koja na ovakav način pruža zahvalu čovjeku koji je nesebično posvetio svoj život unaprijeđenju obrazovanja i procesu prenošenja pravih vrijednosti na mlade, u koje se ova država uzda za nadu i budućnost?

Aktuelnu listu potpisnika pisma možete pronaći na <https://otvorenopismo.github.io/>